

Omm Nickeloos-Owend

Als in dere Woch omm 6. Dezember de Nickeloos-Owend gekumme war, hadd su enn Alde wie isch onn die Kindheit zurigg gedenkd. Unn wenn isch donn onn de Nickeloos gedenkd habb, iss merr oigefalle, dass su um die Johnn bis 1940 isch misch onn koon Nickeloos erinnern koon unn aach späder in de Johnn 1940 bis 1945 nitt, weil doo warn die Nickeloose joo all im Kriesch. Doo wars immer die Mudder, die owends oogefonge hott, vumm Nickeloos ze verzähle unn dass der grad vor emm Aacheblig doogewese iss unn villeischd e Dutt uff die Trepp gestellt hädd, moin Bruder unn isch, mir sollte mol gugge. Unn gugg, es warn die Plätzjer, die merr e paar Daach devor mett kloone Förmscher aus emm platt gewalzde Deich gestoche hadde. Hädder merr gefroochd hätts gehaaße, ei sicher, awwer denkt droo, wen de Nickeloos noch all besuche muss in de Hauptstrooß, su vill kunn der Heilische Monn joo aach nitt schleppe.

Awwer gleisch nooch emm Kriesch iss de Nickeloos widder in unser Haus kumme. Doomols hotts dess mett dem Ho-Ho-Ho noch nitt gewwe, im Geeschedeil, de Nickeloos iss su leise geschliche kumme, dass nor die Mudder den geheerd hott.

Nooch 1946 iss de Nickeloos meddere Zibbelkabb uffem Kobb unn emm Rauschbart omm Kinn mett emm Knecht Ruprecht kumme. Der hott nitt long gefackeld unn hott misch als de Äldesde vunn uns zwaa Brieder in soin Sack gesteggd, also der hott den Sack mir iwwer de Kobb bis erunner zu de Fieß gezoosche, awwer erst hodder mir e paar leichte Schlääch mett soine Rut uff de Hinnern gewwe.

Isch habb außem Sack gejommerd: Isch habb doch gar nix gemachd. Awwer doo hott de Knecht Ruprecht gesaad. Es werdd nitt long dauern unn donn mächsde ebbes unn doodeferr kriehsde heit schunn emol doi Knibbel. Wieh hotts joo nitt gedue, awwer wennde nitt gelacht, awwer laut gekrische, also künstlich geflennd host, hott de Knecht Ruprecht gleich de Sack widder eweck genumme.

Was isch doo verzähld habb, dess duts heit nimmi gewwe. Weil die Kinner heitzedaach dorsch su enn Kerl wie de Knecht Ruprecht unn soin Brauch ferr ihr Lewe long gezeischend wärn. Awwer mir unn aach die onnern Mensche in moim Alder, also jedenfalls die, die isch kenne, lache iwwer su e modern Zeich, weil bei dene iss wie bei mir nix zurigg gebliwwe als die Erinnerung onn gligglische Kinnerdaache.

Eiern Honnes